

盤
洲
文
集

一
二

蘇子卿

PDG

盤洲文集卷第七十六

墓誌五

劉府君墓誌

紹興二十六年十月癸酉成都劉府君卒于梁山年六十五其孤徒行迎柩以明年十月辛酉葬于華陽縣普安鄉白土里又明年十月萬州使君仙井何公檣舩江夏予造焉萬州曰室人擊鮮治具謂當有嘉客而君迺肯臨我則開口一笑良已前定因出諸郎行酒曰是皆劉出也劉公成都人有二女其長歸于我若干年而逝繼室以其季公䟽財好客其女目濡

耳習咸有家法越三日又會于南樓曰昔吾守景陵也公曰聞雲夢澤之名舊矣不一往非鄙則病遂銜舳東下山容浦思振筆朝銓興遠辭綺仞積囊篋一旦蜚歸心索酒展別摩拊甥孫悲來下泣嬰恙中道以不起聞今既寔且祥矣未文其壙非君其誰宜爲萬州英邁不虛美者予曷敢不諾乃考其辭曰劉在成都爲右姓群從同坊閑閤相接所謂夾寨劉家府君少不群有奮拔志嘗曰劉氏善富數世所不足者非財也不學無以崇孝享宗則作家塾聚書求師友合同族之子姓朝夕咨討居亡何從兄長源擢政和

進士科府君諡于衆曰非舌耕明驗歟入類宮以詩
學屢最其列從兄黻爲戶部郎又入京師有聲于賢
關月校季選同舍生自以不及府君有寶帶鼎貴求
旃弗與或曰啗之可以仕子何愛焉曰學不遂命也
帶其褊矣既而曰匹夫懷璧罪將及即拂衣西歸慧汜
三徑與雅人望士日娛其間奴僮走異味於數十百里
外觴豆雜襲放歌樂飲井中車輶後前相因少城爲
冠蓋衝遊客入疆聞府君家居則策馬徑進否則不
歇鞍而行仕其邦者府君未嘗賫刺過之便坐有棋
局客至必對韜其藝不盡出也會通國之善者與戰

終日不名負勝人始驚其奕思無敵同產來剖財不能遏則自占田廬之下下者或緣手盡復推予之綿州守臨邛朱輅簡州治中唐安楊次臯茶馬屬和義王興孫其女兄弟之夫也白頭交驩無違言好施惠出天性凡以冠昏貧病死徙叩門乞資無戚疏高下皆實而歸至有爭鬩不到官府惟府君曲直則頻首聽命始冠有外姻爲亡賴子所辱遇之塗與俱立縣尹庭下其人少長山谷間未識市井詣曹不能出一語府君抗聲爲辯數得直衆繇是異之紹興初胡馬犯饒風蜀騷然不安急欲遁逃府君曰虜入漢中樵

蘇不踵前有劍關後有河池重兵必不爲我患與其
宗家高枕不去蜀人曰夾寨劉家未避賊皆復治生
業後果如其言晚以賞延得將仕郎非其好也時進
士兄以湖北使節攝行帥事屈府君入莫府意不懌
而去府君諱革字某曾祖諱某祖諱某生湖北常平
諱某以故累贈朝議大夫父諱某妻某氏子某嘗試
禮部孫某壻則所謂萬州使君今爲右朝請郎名桀
靖康相之弟也銘曰 簞多金者裂儒衣官桑榆者
倒行逆施則輕毛毳祿不可羈嗟若人者幾希

朱安人墓銘

夫人饒州樂平朱氏贈右宣教郎同縣夏公諱某之
妃左朝奉郎知洪州南昌縣康佐之母夏氏三世壽
母年皆望百夫人始執箕帚逮事祖姑以及其姑節
適寒暑燥溼進甘毳唯謹有疾視絮湯液不去側縫
紉漱浣之事必躬親之人故稱爲夏氏孝婦勉其君
子游學四方有籍籍聲人故稱爲夏氏令妻蚤廢居
家滯貧或怵其事它姓則毅然自誓誨其二子曰康
又爾幹家之蠱母遠仵佰以奉我水菽曰康佐爾努
力校官究六經百氏之說母荒于嬉以開厥家二子
銜訓不怠夫人見其伯焦心治生則喜仲旬歲一歸

叩其說則又喜天子即位于睢陽仲徒步入闕上疏
論時政嘗求可使絕國者其子在選中或以親老尼
之及歸以告夫人譙之曰立功名顯父母其孝大於
錄錄邾下也其後仲子擢進士丙科壹爲尉再爲令
奉板輿之官事有疑必啓而後行夫人嘗以省刑罰
薄稅歛爲戒素有識鑒其子與僚朋接必從屏間竊
聽其語已而曰某賢人也可以友某小人也欲其子
必思有以遠之故稱爲夏氏賢母夫人生少疾春秋
高視聽不衰食生飲寒少壯所不及歲時慶會内外
戚疏遮前塞後以其次曹偶奉觴飲之既雖多而不

亂以子恩封太孺人又進太安人以紹興二十七年
六月辛亥終壽八十有四康又已先卒某人某人其
壻也孫男四人女六人曾孫六人元孫一人顧言曰
勿遠營宅兆康依乃卜所居之西惟錦坡食蓋其縣
之某鄉某里也以次年十一月壬申塋走書幣來謁
銘始予舉博學宏詞南昌寔同年進士講同郡之好
而知其學問之富予貳郡天台而南昌官奉化壤相
接也則聞其官事之辦及予省親炎荒拜道江右會
之于吉水又會之于南昌益得其絃歌之績母之教
然也其可以不能銘爲解乃銘曰邊鉏孔時蘋以芼

之不愛其織惟樂告之有言恤緯誰者導之黃髮紫
誥斯其所以報之文其哀石後也考之

向通判墓誌

公諱仲堪字元仲饒州樂平人紹興二十七年三月
甲午以右朝請大夫通判贛州卒年五十八後二歲
予守荆門公兄直祕閣伯奮以節鎮京西過予言曰
吾昔爲吉州元仲自贛告相見期吾臨章江日夜遲
其下第弗至而訃寔聞在原之痛時往月來猶昔也
將歸掃先人墳墓祔其葬今壓於上命不得視其棺
入土天將何以紓吾悲將子銘納諸丘中使死且不

朽我亦收淚不恨予曰贛州法當銘公言不可忍聽
其能飾以辭會予徒歎未克作今年其子友益卜四
月乙酉合夫人氏之喪葬于縣豐樂鄉貴潭之山遂
以祕閣公所爲狀來曰君忘荆門之請乎予即日次
其事向子姓派於宋繇春秋以來稱世有人至我宋
復盛有篤行君子諱宗尹者生右朝奉大夫諱蔚大
夫生贈少師諱乂中嘗知汝州至徽猷閣待制娶丞
相清源王女曰魏國夫人何氏是生公公方少時頭
角嶷嶷然補太學弟子貢一時儕流傾下之以門功
脫褐授承務郎主管亳州明道宮攝開封丞權貴人

請託不聞耳朝士一辭賢之監在京都茶庫疊受賞
渥亡日版曹借以臨劇至輒辦再滿秩改監京西排
岸司宣和中詔舉材可治民者公爲戶部尚書康公
執權得遂知福之長溪縣繩蒺液枯剖析滯訟效異
等驗白瀕海作戰艦起緡錢它邑騷動惟長溪無秋
毫擾丞相李公綱言公可用通判洪州江西故多盜
帥梁公楊祖以嚴治獲者必抵死嘗諉公審二盜吏
抱成案來前摘公書紙尾公問盜皆安在吏曰盜服
矣官當占位落筆尚何問公曰吾不見囚則如勿審
同寮或訐其立異公曰得一切便宜從事者帥也付

之吏則有三尺法執不回盜得死戒論梁大喜自是
爲霽威盜有生者莫府事無巨細必參公謀居亡何
梁入爲兵部侍郎語人曰吾見上當首薦向君暨梁疾
不能朝公亦以憂去又通判池州贛州贛承叛卒喋血
之餘百姓甫免毒螫公數行太守事摩撫瘡痍流庸
盡還大賈訟鹽債鞫繫數十百人延歲月不決公曰
質劑按牘今焚亡餘矣窮民繫牢戶非瘐死不得出
爲白外臺請之朝咸得釋公智略多輒見事風生持
論纒纒有本末坐上客傾聽方事之叢它人園視無
措公笑語指麾永釋纒解使有位於朝其建置當不

錄錄或專一城使一道必能爲人所難惜乎年不過六十位不過州佐抱才弗施事止此配何氏直龍圖閣琬之孫魏國從子也事姑孝藥膳非經手不進誦釋氏金剛經悟四句偈臨終沐浴更衣集子婦付家事一語不亂公卒之明年六月辛卯也年五十七累封宜人男子六友益右從事郎淮西江東總領所膳軍庫友旦右迪功郎廣德主簿友蔓友正皆將仕郎友恭未仕女子二長適右迪功郎巴陵主簿程湜孫男三可大彌大必大孫女四今年實紹興三十年銘曰厥智穀轉猶玉弗銜前輓後推止刺史半彼平平

者印纍節召縮手裏間不頤以笑貴潭之宅維龜墨
食後昆振振曰君子澤

徐府君墓誌

紹興二十九年慈寧宮太后聖壽八十天子進觴展慶
推錫類之澤凡九品有秩其親耄齒者咸得官封饒
之樂平徐君諱某以其子前太平州司戶叅軍某之
故特封右承務郎致仕制書下君秀髮豪眉舒紳擁
笏偃躬下拜孫曾繩繩導趨後先遠近姻族無少長
皆往賀象軸錦韜爭快先覩君侈上之恩魚羔酌醴
日與賓客相娛樂絲竹莞絃之聲輩作肅餞酬對精

神不少衰以其年某月某日卒春秋九十有一子中表或與之有連不憚嶺阨袖其事來乞文乃爲之崖略其說云君之字某其先自洪徙焉曾大父某大父某生廣東轉運副使某累其贈至通議大夫父某君嘗提筆與逢掖游會親疾歸視方藥訖喪遂無干祿意隱居治生其心計絕人遠甚不夸多田以圉奪窶人子不以子金錢末倍稱之息不射時幹貨以龍斷一鄉閱數年錢派地上乃築室石硯之陽走奴隸求古今方策于異州旁縣延致知名士教勒子孫族兄某握江東使者卽番其治所也君則閉關省人事家

書爲之踈闊歲乙卯大飢米石至萬錢皆閉糴君傾
困不小靳又輸粟郡郭聚餓者于僧坊哺之或求其
別圃君曰是嘗以佳花遺我歸其金而予之券或以
田質積歲無以償則火其約聞人急周之唯恐後始
室某氏再某氏四男某某某三女爲某某妻孫
男若干女若干曾孫男女若干君自擇壽藏于某鄉
某原卜次年某月甲子窆銘曰

富而仁善充其身旄期而出綸有息業文宜昌而屯
將在後之人

白宜人墓誌銘